
ТЕХНИК ВА ТЕХНОЛОГИК ЯНГИЛАНАЁТГАН ФАРҒОНА НЕФТНИ ҚАЙТА ИШЛАШ ЗАВОДИ САЛОҲИЯТИ КЕНГАЙМОҚДА

Бугун вилоят ҳокими Хайрулло Бозоров Фарғона нефтни қайта ишлаш заводида бўлиб, корхонанинг техник ва технологик янгиланиши, модернизация босқичлари, нефть маҳсулотларини бирламчи қайта ишлаш, лаборатория таҳлилларини амалга ошириш жараёнлари билан танишди.

Фарғона нефтни қайта ишлаш заводида ўтган йилнинг 3-чорагида корхона ҳудудидаги ГДС қурилмаси – дизель ёқилғисини гидродесульфуризация қилиш участкаси реконструкция қилиниб, ишга туширилган эди. Ҳозирда умумий қиймати 300 миллион АҚШ доллариға тенг лойиҳани 2023 йилга қадар амалга ошириш бошланган.

2023 йилга қадар ФНҚИЗда ёқилғи ва мой маҳсулотлари олиш усули саналган гидрокрекинг ва изомеризация жараёнларини босқичма-босқич жорий этиш ҳамда Евро-4, Евро-5 стандартидаги ва АИ-92 маркали автомобиль ва дизель ёқилғиларини ишлаб чиқаришни ташкил этиш томон дадил қадам қўйилди.

Мустақиллигимизнинг 30 йиллик байрами арафасида эса Фарғона нефтни қайта ишлаш заводида Евро-5 стандартларига жавоб берадиган дизель ёқилғиси ҳамда API стандартлари бўйича II ва III гуруҳдаги юқори сифатли автомобиль мойи ишлаб чиқариш амалиётга жорий этилмоқда.

Шундай қилиб бу ўзгаришлар ўз навбатида заводда ишлаб чиқарилаётган Евро-2 дизель ёқилғиси сифатини Евро-5 стандартлари талаблари даражасига оширмоқда. Бу олтингугурт чиқиндиларини камайтиришга, экспорт имкониятларини кенгайтиришга ва толлинг операцияларининг жозибадорлигини оширишга хизмат қилади.

Евро-5 дизел ёқилғисининг бугунга қадар тайёрланаётган аналоглари олдида қатор афзалликлари мавжуд. Жумладан, ёқилғининг ёниш жараёни такомиллашади ва унинг сарфи камаяди. Шовқин, тебраниш ва коррозия тезлиги пасаяди. Двигателни ишга тушириш эса осонлашади.

Вилоят раҳбарига заводдаги ушбу жараёнлар ҳақида батафсил маълумотлар берилди.

Бундан ташқари, заводнинг 8-цеҳида жойлашган темирчилик, металларга ишлов бериш, чўян қўйиш бўлимидаги иш жараёнлари ҳам вилоят ҳокимининг эътиборини тортди. Бу каби ишларни кенгайтириш зарурлиги айтиб ўтилди.

Шу куни маҳсулотнинг қулай тез фурсатларда сотувини йўлга қўйиш мақсадида очилган заводнинг телеграм боти ҳам таништирилди. Ботнинг ишга тушиши натижасида харидор томонидан сотиб олинган товарни юклаб жўнатиш бўйича олдиндан сўров жўнатиш имконияти пайдо бўлди. Бу билан харидор томонидан сотиб олинган товар бўйича ҳужжатларни қабул қилиш ва расмийлаштириш жараёни шаффофлиги таъминланиб, сарфланадиган вақтни қисқартиришга эришилди.

Конференция залида эса заводдаги ишлаб чиқариш линияларида амалга оширилаётган ишларнинг бориши бўйича тақдимот ҳам ўтказилди. Сўнг шу жойнинг ўзида “Евро-5” русумидаги дизел ёқилғиси ишлаб чиқариш цеҳи ҳамда бошқа цеҳ ва участкаларида намунали фаолият олиб бораётган бир гуруҳ ишчи ва хизматчилар алоҳида эътироф этилиб, вилоят ҳокимлигининг диплом ва совғалари топширилди.

